

# Kaarata ya nabiili ya Pawulo yowaalebela aKorintu

## Madhu oovolowana

Murumiwi Pawulo aalebele kaarata ela aKirixtu yaali nluwa na oKorintu ni oororomela aatene a oGeresiya. Oononelamo a Bibiliya enoobuwela wi alebile kaarata ya nabiili ela vigavirile yaaka emohi agalebile kaarata yowambeela. Pawulo valebiiye kaarata ela akala oMasedoniya.

Ela yalebeliwe mwaha wa makathamihho yatatamuliwe ni anamasuuziha amohi ooratha. Aliwa yookoodda othongi ni orumiwi wa Pawulo, mowindo yahitatomula waanganyedha odheela Muselu Wapama oyene walaleyiiye. Yoomwinkedha Pawulo wi ohupoothowiha korowa dhasokeleliwe mwaha wa aKirixtu oorabula a oZheruzalemi. Teto yeera wi oliye kaali muthu oororomeleya, vowi ahiwoga wi eere odhowa aweddeeddele, nuwindo kaagelewo.

Pawulo onowawuubusedha oororomela wi egumi yaaye vaari va aliwa yaalive yooriiheya teto wi Muselu walaleyiiye waali wa ebaribari. Ahawaaddeliihamo mwahaya weerihile wi eemelihe olenddo wowaweddeeddele. Ahaawaraaliha wi yiisasanyedhe pama ofiya waaye weereye mowaaguva.

## Ogawanyeya wa kaarata

Madhu owambeela *1.1-11*.

Wiimeliha olenddo *1.12 ofiyedha 2.13*.

Murumiwi a ebaribari *2.14 ofiyedha 5.21*.

Weehiwa ni mvahi dha Pawulo *6.1 ofiyedha 7.16*.

Wiithaneliwa mwa owoma murima vaari va osokela *8.1 ofiyedha 9.15*.

Wiyaakihedha wa Pawulo ni okoneya wa arumiwi ooratha *10.1 ofiyedha 12.21*.

Olibihiwa ni olojela *13.1-13*.

### Madhu oolojela

**1** <sup>1</sup> Wa gerezha eli oKorintu ni oweela mirima aatene a oAkaya aatene. Di miyo Pawulo, murumiwi a Yesu Kirixtu mwa ofuna wa Mulugu. Gili vamohi ni ddibilihi Timoteyo.

<sup>2</sup> Mulugu Babihiu ni Nabwiya Yesu Kirixtu yuuvaheni mahala ni murenddele mmirimani mweenyu.

### Pawulo onomuthithimiha Mulugu

<sup>3</sup> Nimuthithimihe Mulugu, Baba a Nabwiya eehu Yesu Kirixtu, Baba a thagaraga, Mulugu ootodola mwa dhaatedhene. <sup>4</sup> Oliye dinanitodola moorabulani mweehu mwaatemwene wi naatodolege akwiihu ale enarabula, nilabihaga dhootodola dhimohive Mulugu dhinanitodoliyena hiyeneene. <sup>5</sup> Vowi mwa mukalelo mmohive onarabulihiu vajinji wona Kirixtu varabuleliye, mwa mukalelo mmohive odheela mwa Kirixtu nnotodoliwa vajinji. <sup>6</sup> Akala nnorabulihiwa sowi fu otodoliwa weenyu ni ovulumusiwa weenyu. Akala nnotodoliwa sowi fu otodoliwa weenyu. Otodoliwa wula onowuuvahani ovilela wi mvilelegena dhoorabula dhimohive dhinarabulana hiyo. <sup>7</sup> Yoojejiha yeehu wa nyo sa ohuthikeya. Vowi nihinona wi mwa mukalelo mmohive niliihu vamohi moorabulani mmohive, ndo teto nneere okala vamohi mootodoliwani mmohive.

<sup>8</sup> Vowi addibilaga, arogoraga, kaginafunu wi mukale oohunona masooso yoonile hiyo elabo wa oAziya. Yaali oonikwaranya kopolo dheehu, ofiyedha ohujejihedha wi neere okuma nigali agumi. <sup>9</sup> Ebaribari, naali wona naakelile othongeliwa okwa. Vano ela yaali wi nihiiroromelaga mwa weekiihu mbwenye nimuroromelaga Mulugu onaavenyiha athu ookwa. <sup>10</sup> Oliye onivulumusile mwa dhowoopiha dhootthabwa dhinajejihihiu, vano oneerege onivulumusave; mwa oliye nihikanna ojejiha wi oneere onivulumusa. <sup>11</sup> Soofuneya wi munikamihedhege mmalobeloni mweenyu. Ndala athu ajinji eneere omutthetheela Mulugu mwaha wa opama ovahiwihiu odheela malobelo a athu ajinji.

### Wiimeliha olendo

<sup>12</sup> Wiithukulela weehu fu wula, moobuwelele eehu ononiirela onamoona wi mwiilaboni mu niheeddamo ni mirima dhoweela, dha ebaribari, ehili ni ononelamo wa athu, mbwenye ni mahala enadha wa Mulugu, tthabwa-tthabwa needda mwa mikalelo dhapama nda ni nyo. <sup>13</sup> Kavili yego emohi yuulebeliuhuni, ohiya nde dhineelengiinyu pama, murumeedha; vano ginojejiha wi muneere orumeedha dhaatedhene, <sup>14</sup> wona teto mwambeele onirumeedha hiyo. Ginojejihedha ndo wi va nlabo na Nabwiya<sup>a</sup> eehu muneere wiithukulela wa hiyo teto hiyo niithukulele wa nyo.

<sup>a</sup> 1.14 Nlabo na Nabwiya nnaagiwana nlabo noowela Yesu.

<sup>15</sup>Mwaha woororomela wula gafunile guweeddeleni vowambeela wi mwaakele mareeliho dila biili. <sup>16</sup>Gafuna guweeddeleni gaaviraga gayaaga oMasedoniya teto gaakumaga oMasedoniya, gafuna gigumane ni nyo wi mugikamihedhe muulenddoni mwaaga woodhowa oZhudeya. <sup>17</sup>Gigoobuwelele wiirana nda waali ohuubuwela pama? Goobuwele wona munoobuwela athu a elabo? Sowi ginawoga wona aliwa, eneera: “Ee, ee!”, mudhidhi mmohive, yiiraga: “Eehi, eehi!”?

<sup>18</sup>Mulugu doororomeleya, mwa mukalelo mmohive olaleya weehu foororomeleya. Kahuwo “Ee!”, teto mwa mudhidhi mmohive “Eehi!” <sup>19</sup>Vowi odheela mwa Mwaanaye Yesu Kirixtu, oyene alaleyiwe vaari veenyu ni miyo, Sila ni Timoteyo, Mulugu kaawogile “Ee!” teto mwa mudhidhi mmohive “Eehi!”, mbwenye mudhidhi waatene awoga “Ee!” <sup>20</sup>Vowi naawogaga dhoororomeliha dhaatedhene dha Mulugu: “Ee!” a dhoororomeliha nda onafwanyeya mwa Yesu Kirixtu. Bumwahaya, odheela mwa oliye nnarumeedheliihu “Ameni!”, wi Mulugu athithimihiwe. <sup>21</sup>Vowi di Mulugu wiirilena wi hiyo ni nyo nikale ookaraateya mwa Kirixtu. Di Mulugu mmohive oyene onikuthulele makura,<sup>b</sup> <sup>22</sup>ohelile etoonyihedho yaaye mwa hiyo wi oonihe wi nili aaye, teto ohuhela Muneba waaye mmirimani mweehu wona yoororomeliha yowi oneere onivaha dhaatedhene dhinaniroromelihiye.

<sup>23</sup>Ginomuloba Mulugu wi akale namoona aaga wi nda ginalebiimi seebaribari: Miyo kagiwelele oKorintu mwaha wi kagafuna wuwoonihani goyi naari wuuporosani. <sup>24</sup>Nda kadhinatapulela wi hiyo nihikanna othongi wa nrromelo neenyu. Moohiyaniha, hiyo nnalaba ni nyo wi mukalena ohagalala, vovi muli ooliba munroromeloni mweenyu.

**2** <sup>1</sup>Kagiwelile wi guweddeeddeleni vovi kagifunile wi guwukuuwiheni dila biili. <sup>2</sup>Vovi gowukuuwihani onaagihagalalihe baani, ahili nyeene guwukuuwihiliimini? <sup>3</sup>Va mwaha olena guulebeliimini kaarata ela:<sup>c</sup> Gilebele wi gadha gidha wa nyo miyo gahukuuwe ni ale yafwaneele ogihagalaliha. Ginororomela mwa nyo mwaatene wi ohagalala waaga teto fu ohagalala weenyu. <sup>4</sup>Miyo guhuulebelani ni murima woodhaaliwa makathamihoni ni dhowukuuwa, guhuulebelani ehili wi mukuuwe, mbwenye wi munone odhivela wuulubale winniimina wa nyo.

### Mmulevelelege muthu oothega

<sup>5</sup>Akalavo vaari va nyo atatamule wukuuwa kaagukuule miyeeneve, mbwenye ginoona wi wawukuule ajinji a mwa nyo. (Kaginawoga moweenjedhedha.) <sup>6</sup>Otomeyiwa otomeyiwiye ni anamwinji ohaakwana.

<sup>b</sup> 1.21 *Onikuthulele makura enatapulela ohunisakula.* <sup>c</sup> 2.3 Ohiya waweddeeddelave aKirixtu a oKorintu, Pawulo ahaalebela kaarata nihili nenddive naari kaarata AKorintu Owambeela.

<sup>7</sup>Vano dhiinova mmulevelele ni omulibiha wi onaagonjihiwe ni wukuuwa wookwaranya. <sup>8</sup>Mowindo ginowuulobani wi mmoonithe odhivela winniinyuna wa oliye. <sup>9</sup>Mwahaya buuyene guulebeliimini wi goone akala muli owiwelela mwa dhaatedhene. <sup>10</sup>Mwamulevelela muthu mmohi miyo teto ginomulevelela; ele yaleveleliimi (akala gahilevelela yego) galevelele wa opama weenyu vameentoni va Kirixtu. <sup>11</sup>Giirilena ela wi nnanyengethiwe ni Sathana, vowi nihinona dhowiira dhaaye.

### Okathamiheya wa Pawulo oTorowaddi

<sup>12</sup>Ngafiyile oTorowaddi wi galaleyeye Muselu Wapama wa Kirixtu, gahoono wi Nabwiya ohugifugulela mulago, <sup>13</sup>mbwenye mmunebani mwaaga kamwaali murenddele mwaha wi kagamfwanyilewo ddbilaga Titu. Nuwindo, gahaapaganya aliwa, miyo odhowa oMasedoniya.

### Murumiwi a ebaribari

<sup>14</sup>Nimutthetheele Mulugu, ole onanisogolela malabweene, anivaha-gonjiha odheela mwa Kirixtu. Mulugu ononilabiha wi amwadhele wa athu aatene muselu onawoga dha oliye dhipaddi dhaatedhene wona munamwadheyela makura onukwela pama. <sup>15</sup>Vowi hiyo nili onukwela wapama onavahiwa ni Kirixtu wa Mulugu vaari va ale enavulumusiwave ni ale enarimeelave. <sup>16</sup>Wa ale enarimeelave onukwela wula fuukwawene. Mbwenye wa ale enavulumusiwave onukwela wula si egumeene. Kalivo onaanda nibasa ndda. <sup>17</sup>Vowi hiyo kanili wona ajinji enaguliha madhu a Mulugu. Mbwenye nili mwa Kirixtu, naali oorumiwa ni Mulugu, nna-woga vameentoni vaaye nihisayelaga dhimohi, naari mpurelo.

**3** <sup>1</sup>Nawogaga nda munoobuwela wi nneetthetheela weekiihu dila biili? Sowi nnarabulela wona amohiwa, kaarata ya onamoona wa nyo, naari na nyoovo? Nivang'onong'ono! <sup>2</sup>Nyo dili kaarata yeehu ya onamoona elebiwe mmirimani mweehu wi ekale yoononeya, eneelengiwa ni athu aatene. <sup>3</sup>Nyo munooneya wona muli kaarata yoolebiwa ni Kirixtu, dhoovaha dhowiimelela weehu, kanilebiwe ni tinta mbwenye nilebiwe ni Muneba wa Mulugu ookalawo, kanilebiwe mmatabwani a nibwe mbwenye mmatabwani a mirima dha omuthu.

<sup>4</sup>Nnawogela nda mwaha woororomela winniihuna mwa Mulugu odheela mwa Kirixtu. <sup>5</sup>Kahuwo wi nnoobuwela wi nihaakwaniha wiirana yego ni kopolo dheehu-dheehu; moohiyaniha, nihinona wi kopolo dheehu dhinadha wa Mulugu. <sup>6</sup>Oliye dinivahile kopolo wi nikale amwiimeleli a nipangano no waandana nixa; nipangano nddi nihili mwa maleba oolebiwa mbwenye mwa Muneba; vowi maleba oolebiwa enopa mbwenye Muneba onavaha egumi.

### Nthithimiho na nipangano no waandana nixa

<sup>7</sup>Wiimelela odhiilena okwa ohutopiwa ni maleba vamabweni, wiimelelawo ohudhana nthithimiho. AEzarayeli kayaanda omusugwa Mozezi

mwaha wa nthithimiho naali vakoveni vaaye, nthithimiho nddo naali noovira. Vano akala wiimelela odhiilena okwa waali woothithimiheya, <sup>8</sup> wiimelela wa Muneba Woweela kunaakale woothithimiheya mookwaranya? <sup>9</sup> Vano akala wiimelelawa odhiilena okoniwa wahikanna nthithimiho, tthabwa-tthabwa wiimelela onadhana wogoowa onaakale woothithimihiwa mookwaranya. <sup>10</sup> Naawogaga dha mwiimelelelo miindinda, ebaribareene wiimelela wanna nthithimiho wale, dhiinova kwinna nthithimiho mwaha wa nthithimiho na nabiili ndde nili nookwaranya. <sup>11</sup> Vano akala ele yaali yoovira ehooneyiwiwa ni nthithimiho, ele ehi-namala eneere okanna nthithimiho nookwaranya!

<sup>12</sup> Mwaha wookalana ojejiha wowi ndala, nneedda nihoovaga yego. <sup>13</sup> Kanili wona Mozezi akuneela kove yaaye ni guwo wi aEzarayeli ehoone omagomelo wa nthithimiho namala. <sup>14</sup> Moobuwelelo ewa ehifugeleya. Ofiyedha peeno neelengiwaga nipangano no waandana na wale kineeweelamo mwaha wi guwo ele kivenyihiwewo. Vowi mwa Kirixtu baahi finavenyihiiwawo. <sup>15</sup> Ofiyedha peeno mudhidhi dhaatedhene yeelengaga maniivuru matanu yaalebile Mozezi<sup>d</sup> guwo eyo elive mmurimani mweewa. <sup>16</sup> Mbwenye mmohi arugunusela murima waaye wa Nabwiya, guwo eyo enovenyihiwawo. <sup>17</sup> Vowi Nabwiya bu Muneba. Vevo vinakala Muneba wa Nabwiya vihikala otapuwa. <sup>18</sup> Hiyo aatene, ni kove yoohukuneeliwa, noonaga nthithimiho na Nabwiya, nnosadduliwawe wi niliganege ni oliye. Vang'ono-vang'ono nnosadduliwawe okala oothithimiheya mookwaranya. Osadduliwa wula oneereya ni Nabwiya oli Muneba.

### Oreela woologoleliwa mminoni

**4** <sup>1</sup> Mulugu ni thagaraga dhaaye ohunivaha wiimelela wula, mwaha wa eyo kannalamwisa. <sup>2</sup> Ohiya ndo nnokoodda dhikalelo dhoonyengetha, dhookaliha manyazo; kannalabiha dhooratha, naari ogombiha madhu a Mulugu. Moohiyaniha, naalaleyaga ebaribari voweela, nno-wooniha ororomeleya weehu wa athu aatene vameentoni va Mulugu. <sup>3</sup> Akala Muselu Wapama onalaleyiihu bookuneeleya, onaakuneeleyela ale enarimeelave baahi. <sup>4</sup> Owoga dha aliwa mulugu a elabo ela ohaakuneela moobuwelelo a ale ehinaroromela wi waara wa Muselu Wapama ohaamoneyele aliwa. Waara wula onooniha nthithimiho na Kirixtu. Ole oli oofwanafwana ni Mulugu. <sup>5</sup> Hiyo kannalaleyia nthithimiho neehu, mbwenye nnamulaleyia Yesu Kirixtu Nabwiya, vano niisorihaga hiyo wona adhaari eenyu mwaha wa Yesu Kirixtu. <sup>6</sup> Vowi Mulugu eere: “Muyiihini mukale waara”, oliyeene dimoneyile mmirimani mweehu wi ni

<sup>d</sup> 3.15 Maniivuru ayo enaagiwana baala: Wambeela, Okuma, Levitiku, Numero, Deterono-miyo. Maniivuru ala bineethaniwa Malamulo a Mulugu.

waara wo naande onona nthithimiho na Mulugu nnooneya vakoveni va Yesu Kirixtu.

<sup>7</sup>Mbwenye hiyo nihikanna oreela wula wa Mulugu, mwa mwiili dhoolodhowa wona mino dha ologo wi dhoonihe wi owodha wuulubale fwa Mulugu, kahuwo weehu. <sup>8</sup>Mudhidhi dhaatedhene, dhipaddi dhaatedhene nnorabulihwa mbwenye kannagonjihiwa, nnokala owanganyedha mbwenye kannahiya ojejihedha. <sup>9</sup>Nnoharahariwa mbwenye kannahiwiwa, nnoporosiwa mbwenye kannatolosiwa. <sup>10</sup>Nnothukulave mmwiilini okwa wa Yesu wi egumi ya Yesu yooneyihiwe mmwiilini mweehu. <sup>11</sup>Vowi viliihuwo nnoveleliwa muukwani mwaha wa Yesu wi egumi yaaye teto yooneyihiwe mmwiilini dheehu dhookwa. <sup>12</sup>Vano okwa onalaba mwa hiyo, egumi enalaba mwa nyo.

<sup>13</sup>Maleba Ootaleleya yiire: “*Gihiroromela, mwahaya buuyene giwogeliimi*”.<sup>e</sup> Hiyo ninna mukalelo mmohive woororomela, mwahaya buuyene onawogeliihu, <sup>14</sup>nnonaga wi ole omvenyihile muukwani Nabwiya Yesu teto oneere onivenyiha vamohi ni Yesu wi anithukulele vamohi ni nyo vameentoni va Mulugu. <sup>15</sup>Vowi dhaatedhene dhedho sa opama weenyu wi mahala a Mulugu eneenjedhedheya wa athu ajinji edhihe otthetheela woweenedhedheya wa nthithimiho na Mulugu.

<sup>16</sup>Mwaha wa ela kannalamwisa. Naari omuthu weehu wowooneya ovuddaga, omuthu weehu wochooneya onovirisedhiwaga nlabo ni nlabo. <sup>17</sup>Vowi makathamihho eehu eli oovevuwa, oovira enokaliha mwa hiyo nthithimiho nuulubale na okala ni okala nnakwaranya dhaatedhene. <sup>18</sup>Hiyo kannasugwa dhego dhowooneya, mbwenye nnasugwa dhego dhohooneya, mwaha wi dhowooneya kadhinalogela, mbwenye dhohooneya sa okala ni okala.

### Efunelo yookala ni Kirixtu

**5** <sup>1</sup>Vowi nihinona wi musasa munakaliihu, oli mwiili weehu mwiilaboni ela, wabwanyuwa, Mulugu oneere onivaha nyuba odhulu ehimagiwe ni madada a muthu, nyuba eyo enaakale ya okala ni okala. <sup>2</sup>Vowi nnowii-buleela vinakaliihu mmusasani ola wa dhiinova, nrabulelaga owara nyuba yeehu exa ya odhulu,<sup>f</sup> <sup>3</sup>mwaha wi voowara nyuba exa eyo kannafwanyuwe nigali madave, nihinna mwiili. <sup>4</sup>Vowi vinakaliihu mmusasani mu, nnowii-buleela nrabulihwaga ni mwiili weehu. Eyo kahuwo wi nikale madave, mbwenye wi niwarihiwe nyuba yeehu ya odhulu wi ele eli yookwa emiriwe ni egumi. <sup>5</sup>Onisasanyedhele dhego dhedhi di Mulugu, oyene onivahile Muneba Woweela wona yoohiddeeliha wa dhedho dharoromelihiye.

<sup>6</sup>Mowindo nnoliba murima malabo maatene, nnonaga wi viliihu mmwiilini nili woolapela ni Nabwiya. <sup>7</sup>Vowi nneeda mwa nrromelo,

<sup>e</sup> 4.13 Masaalimu 116.10    <sup>f</sup> 5.2 Nyuba Eyo enaagiwana bu mwiili weehu wa odhulu.

ehili mwa nde dhinoonihu. <sup>8</sup>Ee, nnoliba murima. Nnofunesesa ohiya mwiili ola, nakale owani vamohi ni Nabwiya. <sup>9</sup>Mowindo, naari nigali owani, naari nigali ode, nnowiilibihedha omuhagalaliha Nabwiya. <sup>10</sup>Vowi aatene nnoodha nifiye vamutthegoni wa othongi wa Kirixtu wi kadda muthu aakele yooliveleliwa yaaye, ya ele yiiriliye mwiilaboni ya vati mwa mwiili ola, naari ekale yapama naari ekale yabure.

### Waandana ni Mulugu odheela mwa Yesu Kirixtu

<sup>11</sup>Mowindo, mwaha wi nihinona omoova Nabwiya, nnosayela waakwekwetha athu. Mulugu ohuninona mowaakwana teto ginojejiha wi nyo muginone mmirimani mweenyu. <sup>12</sup>Kannafuna wiitthettheela weekiihu dila biili. Moohiyaniha, nnafunu wuuvahani mwaha wowiithukulelana wa hiyo wi mukalena yowawaakula ale eneethukulela mwa mwiili, ehili dhili mmirimani. <sup>13</sup>Akala nili ataduwa, bu mwaha womwiimelela Mulugu, mbwenye akala nnoobuwela pama, bu mwaha wa opama weenyu. <sup>14</sup>Odhivela wa Kirixtu ononilamula, vovi nihinona wi mmohi ohaakwela aatene, enatapulela wi aatene ehikwa. <sup>15</sup>Oliye ohaakwela aatene wi ale eliwo ehikalewo mwa weekiwa, mbwenye wi emukalelewo ole akwile, avenyihwa wa opama weewa.

<sup>16</sup>Ndala wambeela dhiinova odhowa osogolo kannampima muthu ni mukalelo wa emuthu, naari wale nampimave Kirixtu ni mukalelo mmohive wa emuthu dhiinova kannampima ndo. <sup>17</sup>Mowindo muthu akala mwa Kirixtu onakala yoopaddusiwa exa. Makalelo eehu awale ehivira, makalelo maxa ehifiya. <sup>18</sup>Dhaatedhene ndo dhinadha wa Mulugu, oyene onandanihe ni oliye odheela mwa Kirixtu teto ohunivaha mabasa owawaandaniha athu ni Mulugu. <sup>19</sup>Ela sowi: Mulugu mwa Kirixtu aali eyaandanihaga ni athu a elabo ela ahaweelengelaga dhoothega dheewa. Teto ohunivaha mutheenga onawoga dhowawaandaniha athu ni oliye. <sup>20</sup>Mowindo hiyo nili anamukathi a Kirixtu, Mulugu asayelaga waakwekwetha athu odheela mwa hiyo. Vano hiyo, mu ndina na Yesu Kirixtu, ninowuulobani mwa ntidi wi murumeedhe waandana ni Mulugu. <sup>21</sup>Kirixtu kanna yoothega, mbwenye Mulugu ahimwiira oothega mwa opama weehu wi mwa oliye noonihe wogoowa wa Mulugu.

**6** <sup>1</sup>Nilabaga vamohi ni Mulugu, ninowuulobani ni ntidi wi muhaakele ebeweene mahala a Mulugu. <sup>2</sup>Vowi oliye wiire:

*“Ogafiyle mudhidhi wofwanelela, gahuwiiwa;  
va nlabo na ovulumusiwa, gahuukamihedha”.<sup>g</sup>*

Ginowaaddela wi dhiinova ola bu mudhidhi wofwanelela, nihifiya nlabo noovulumusiwa.

<sup>g</sup> 6.2 Ezaya 49.8

## Goyi ya Pawulo

<sup>3</sup>Hiyo kannamukwakwathusa muthu wi mabasa eehu ehikale-na yoo haleela. <sup>4</sup>Moohiyaniha, nnooniha wi nili amwiimeleli apama a Mulugu mwa dhaatedhene: Mwa ovilela vajinji, mowoonihiwa goyi, moorabulihwiwa, mowuukuuliwa. <sup>5</sup>Nnovilela moowaxuliwa, moofugeliwa mukaambura, mowiinyuweliwa, moolaba mabasa moohuvuma, moohugona ni mahiyu, mudalani. <sup>6</sup>Teto nnwooniha wi nili amwiimeleli apama a Mulugu odheela weela wa dhigumi dheehu, ni ononelamo weehu, ni ovilela weehu, ni opama weehu. Nnooniha nda mwa Muneba Woweela, mwaha wa odhivela wa ebaribari winniihuna, <sup>7</sup>mwa madhu a ebaribari enaalaleyiihu, mwa owodha wa Mulugu ni yeela dhoowogoo-wa, dhoowanana naari dhowiyaakihedhana. <sup>8</sup>Athu amohi enoniriiha, amohiwa enoninyemula. Athu amohi enoniwoga obure, amohi enonittheela. Athu amohi eneera wi nili anamanyengetha, mbwenye nnowoga ebaribari. <sup>9</sup>Nnooneya wona athu oohunoniwa, naari nigalive oononiwa pamadhene. Athu amohi enaniira ookwa mbwenye niganna egumi, nnwoonihiwa goyi mbwenye kannakwa. <sup>10</sup>Nnokubanyihiwa mbwenye nnokalave oohagalala. Nnooniwa wona oorabula mbwenye nnowareeliha athu ajinji. Nnooniwa wona oohukanna yego mbwenye nihikanna dhaatedhene.

<sup>11</sup>Wa nyo aKorintu, hiyo nnowoga ni nyo mowiiweya teto nihitapula mirima dheehu wa nyo. <sup>12</sup>Mirima dheehu kadhifugeyile wa nyo, mbwenye nyo difugile mirima dheenyu wa hiyo. <sup>13</sup>Ginawoga ni nyo wona anaaga. Mwiirena teto dhedho dhuwiireliihuni: Munifugulele mirima dheenyu.

## Nili nyuba ya Mulugu

<sup>14</sup>Nyo kamwiitaganyihedhe ni nikonddowa nimohive ni ale ehinamuroromela Kirixtu. Vinakala wiiwanana baani vaari va wogoowa ni opwesa nlamulo? Vinakala waandana baani vaari vowaara ni yiihi? <sup>15</sup>Wiiwanana baani olivo Kirixtu ni Sathana? Naari omohi baani olivo vaari va muthu onamuroromela Yesu ni ole ohunamuroromela? <sup>16</sup>Opangana baani olivo vaari va nyuba ya Mulugu ni amilugu oosemiwa? Vowi hiyo nili nyuba ya Mulugu ookalawo, dhili wona Mulugu muwogeliye, eeraga:

*“Miyo ginaakalege ni aliwa,  
gineeddege vaari veewa.  
Ginaakale Mulugu eewa,  
aliwa enaakale nlogo naaga”.<sup>h</sup>*

<sup>h</sup> 6.16 Levitiku 26.12; Ezekiyeli 37.27



17 *“Mowindo, venyavoni  
vaari va athu oohuroromela,  
mmwalane ni aliwa.  
Onawoga di Nabwiya.  
Muhukahinye yego yootakala,  
ndo, miyo gineerege wuwaakelani,<sup>i</sup>  
18 ginaakale babiinyu,  
vano nyo munaakale anaaga  
a alobwana ni aahiyana.  
Onawoga di Nabwiya Oowodha-wodha”<sup>j</sup>*

**7** <sup>1</sup>Akwaaga oodhivela, vovi nihikanna dhoororomeliha nda, ndo-  
weni niyeelihe mwa dhaatedhene dhinatakaliha mwiili ni muneba,  
naakwanelihaga weelihiwa weehu mwa omoova Mulugu.

### Ohagalala wa Pawulo

<sup>2</sup>Munivahe mburo mmirimani mweenyu. Hiyo kanimpudhile muthu, naari omvoreyiha murima muthu, naari omujela muthu mmohi. <sup>3</sup>Kagina-wogela nda wi guukoneni, vovi gahiwoga wale wi nnowuudhivelani vajinji, naari nikwe, naari nikalewo, nili vamohi ni nyo. <sup>4</sup>Gihinona wi ginowaanda owoga ni nyo mowiiweya. Ginowiithukulela vajinji mwaha wa nyo. Gihidhaalihwa ni otodoliwa. Vaari va dhookathamiha dheehu gihidhaalihwa ni ohagalala onatekumave.

<sup>5</sup>Vifiyiliihu oMasedoniya wuno mwiili dheehu kadhivumile. Moohiyaniha, nifwanyile dhoorusa mburo dhaatedhene, koddo ode wa mwiili ni woova wuulubale mmirimani. <sup>6</sup>Vano Mulugu onatodola mirima dha athu owukuuwa, ohunitodola ni ofiya wa Titu. <sup>7</sup>Kahuwo ofiyave waaye wanitodolile teto waali mwaha wa nde dhanaaddeliye dhowi nyo mwahitodola murima waaye. Oliye ohusoriha dhoovoreyiwa mmirimani mweenyu, okubanya weenyu ni nthakwithakwi ninna nyo wa miyo. Dhaatedhene nda dhienjedhedha ohagalala waaga.

<sup>8</sup>Naari akala guhuukubanyihani ni kaarata yaaga, kaginatthwaruwa mwaha wowuulebelani. Vowambeela gahitthwaruwa mwaha wooleba mowindo. Ginoona wi kaarata ele yahuukubanyihani mudhidi vang'ono. <sup>9</sup>Dhiinova gili oohagalala, kaginahagalalela mwaha wowuukubanyihani, mbwenye mwaha wi okubanya weenyu ohuuthukulelani otthwaruwa. Vovi nyo muhukubanyihwa wona mwafunela Mulugu. Mowindo nyo kamuyeleelihiwe yego ni hiyo. <sup>10</sup>Vovi okubanyihwa Mulugu onafuniye kunamuthukulela muthu ovoreyiwa murima, mbwenye onamuthukulela otthwaruwa, ndo dhinomuthukulela ovulumusiwa, vano hiyo kannatthwaruwa wa dhedho. Mbwenye okubanya

<sup>i</sup> 6.17 Ezaya 52.11; Ezekiyeli 20.34,41    <sup>j</sup> 6.18 Zheremiya 31.33; Ezekiyeli 37.27

wa athu a elabo ela onathukulela omakwelo. <sup>11</sup>Nyo mwahikalana okubanya wa musawo Mulugu wafuniliye wi mukalena. Vano moone dhowaakulela dha okubanyawo: Moone wiilibihedha weenyu, moone efunelo yowiyaakihedha weenyu, moone orurumuwa weenyu, moone woova weenyu, moone dhoovoreyiwa mmirimani mweenyu, moone nthakwithakwi ninna nyo wa miyo, moone waaguvela wooniha goyi weenyu. Mwa dhaatedhene muhulawiha wi kamwinna muladdu mwa mwaha olena. <sup>12</sup>Mowindo kagalebele kaarata ele mwaha wa ole eerile yabure, naari kagalebele mwaha wa muthu ole eeriliwe yabure. Moohiyaniha, galebele kaarata ele wa nyo wi mwiiwelelemo nthakwithakwi ninna nyo mwa hiyo vameentoni va Mulugu. <sup>13</sup>Mwahaya buuyene onilibihile.

Ohiya olibihiwa winnihuna, nihidhiveliwa vajinji ni ohagalala wa Titu, vovi nyo mwaatene munomukamihedha wi muneba waaye owelele okala pama. <sup>14</sup>Vovi miyo gahiwoga opama wa nyo wa oliye, vano mwahooniha wi gawoga ebaribari. Wona dhaatedhene dhedho dhawogiliihu ni nyo yaali ebaribari teto dhamwaaddeliliihu Titu dha nyo yaali ebaribari. <sup>15</sup>Vano odhivela waaye wa nyo onowunnuwa oobuwelela mwemo nyo mwamwiiweleliinyu teto mwemo mwamwaakeleliinyu moovaga, mugurumelaga. <sup>16</sup>Ginohagalala vovi ginowaanda wuuroromelani mwa dhaatedhene.

### Owoma murima vaari va osokela

**8** <sup>1</sup>Addibilaga, arogoraga, nnafuna wi munone ya mahala ele Mulugu evahiliiye gerezha dha murudda wa oMasedoniya. <sup>2</sup>Aliwa, vaari va orabula wujinji, enohagalala vajinji. Naari egali oorabula, enovaha mvahi dheewa ni ohagalala waatewene. <sup>3</sup>Vovi ginowiirela onamoona wi aliwa ehivaha dhaatedhene dhandiliisu mookwaranyiha ni moobuwelelo eewa-eewa. <sup>4</sup>Aliwa yahiniloba ni ntidi wi yaakele mareeliho oovolowana mmakamihedhelo mwa athu oweela mirima a oZheruzalemi. <sup>5</sup>Yahikamihedha mookwaranya dhedho dhajjihedhiihu mwaha wi vowambeela yahiiwelela mwa Nabwiya teto mooligana ni ofuna wa Mulugu, yahiipeleka wa hiyo. <sup>6</sup>Mowindo nahimuloba Titu, ambeele osokela dha mvahi nda wi aakwanelihe vaari va nyo mabasa a mahala ala. <sup>7</sup>Mwa dhaatedhene nyo munowooniha wi muli ooreela: Mwa nrromelo, mwa owoga, mwa ononelamo, mwa efunelo yookamihedha, mwa odhivela musuuziliinyu wa hiyo. Mowindo mwiyoonihe teto okala ooreela mwa mabasa a mahala ala.

<sup>8</sup>Kahuwo wi ginowuulamulani, ginafuna wi munone waaguva wa gerezha dha oMasedoniya dhivahile mvahi wi noone akala odhivela weenyu fwa ebaribari. <sup>9</sup>Nyo muhaanona mahala a Nabwiya eehu Yesu Kirixtu yawoonihiliye. Oliye aali ooreela mbwenye ni mwaha

wowuudhivelani oliye ohudha okala oohukalana yego wi nyo mukale ooreela odheela mwa ohukalana waaye.<sup>k</sup>

<sup>10</sup>Moobuwelelo aaga va mwaha olena baala: Enakala ya opama weenyu mwamariha dhambeeliinyu yaaka evirile. Nyo mwaali owambeela ehili okamihedhave, mbwenye teto mwaali oofuna okamihedha. <sup>11</sup>Mowindo mwaakwanelihe okamihedha weenyu. Mwiirena dhedho ni odhiveliwa waatewene mwanniinyuna omambeelelo, mvahaga mooligana ni dhedho dhinniinyuna. <sup>12</sup>Vowi muthu afuna ovaha, Mulugu onowaakela moodhiveliwa dhedho muthu oyo dhinniiyena, Mulugu kanaloba yego muthu ehinniiyena.

<sup>13</sup>Vowi kannafuna wi nyo mukalege mookathamiheya wi amohi ekalege mwapama; nnafunu wi mwaatene mukalege ooligana. <sup>14</sup>Dhiinova nyo muhukanna dhowaakwana, eli pama mwaakamihedhege ale ehaleeliwe. Mowindo mudhidhi mmohi aliwa yadha ekalana dhijinji, nyo mwakala oohaleeliwa, enoodha yuukamihedheni. Ndo vinookala oligana. <sup>15</sup>Wona munawogela Maleba Ootaleleya, yiiraga: *“Oyene aaguddela majinji kaya-hala, ole aaguddela vang'ono yowaakwana”*.<sup>l</sup>

#### Titu ni akwaaye a voolenddoni

<sup>16</sup>Nnomutthetheela Mulugu ohelile mmurimani mwa Titu efunelo emohive yinnihuna yowuukamihedhani. <sup>17</sup>Vowi oliye ohurumeedha owaraaliha weehu woodhowa wuweeddelani, vano oliyeneene onofuna wuukamihedhani ni murima waatene, mowindo onoodha wa nyo wi owooneni. <sup>18</sup>Vamohi ni Titu nihimuruma ddibilihi mmohi onatthetheeliwa ni gerezha dhaatedhene mwa mabasa aaye oolaleya Muselu Wapama. <sup>19</sup>Teto ohusakuliwa ni gerezha dhaatedhene wi anivelele olenddo weehu woodhowa opeleka mvahi dha mahala. Nneerana mabasa ala wa nthithimiho na Nabwiya ni wooniha efunelo yeehu yookamihedha. <sup>20</sup>Nnathawa wi ahikalevo ooniwoga mwabure mwa mukalelo wa meeddihelelo a mvahi dha owoma mirima dheenyu. <sup>21</sup>Vowi dhinasayelihiu sowiirana dhili dhowogoowa, ehili vameentoni va Nabwiya teto ni vameentonivene va athu.

<sup>22</sup>Vamohi ni aliwa nnomuruma teto ddibilihi mmohiwa, nimweehiliihiu mmurimani mwaaye dila dhijnjidhene, da nthakwithakwi mookwaranya. Vano dhiinova oliye dowaguva mookwaranya mwaha wa nrromelo ninniiyena wa nyo. <sup>23</sup>Owoga dha Titu, oliye di mukwaaga, onalaba ni miyo mwa opama weenyu. Owoga dha addibilihi amohi enamevelela, aliwa erumiwe ni gerezha dha wuno, aliwa enamuthithimiha Kirixtu. <sup>24</sup>Mowindo, vaari va aKirixtu aatene, mwawoonihe addibila

<sup>k</sup> 8.9 Mukale ooreela Oreela onaagiwana kahuwo korowa naari wa mwiilaboni, oli mu dhoororomeliha dha Mulugu. <sup>l</sup> 8.15 Majinji enaagiwana manaa. Moone Okuma 16.18.

ala odhivela winniinyuna wa aliwa, mwawoonihe teto wi wiithukulela winnimina wa nyo foofwanelela.

### Mvahi dha aKirixtu a oZheruzalemi

**9** <sup>1</sup>Kadhinafuneya wi guulebeleni kaarata mwaha wa mvahi dha oweela mirima a oZheruzalemi. <sup>2</sup>Gihinona wi nyo munofuna okamihedha. Ginowogesa pama vajinji dha nyo wa athu a oMasedoniya, gihawaaddela wi gerezha dha oAkaya dhihiisasanyedha wambeela yaaka evirile. Vano nthakwithakwi neenyu nihaawaraaliha ajinji. <sup>3</sup>Dhiinova ginowuurumihedhani addibila ayo wi dhego dhapama dhiwogiliimi dha nyo va mwaha olena, dhihooneye wona dhooratha. Teto aliwa enoodha mukale owiisanyedheene wona muwogeliihu. <sup>4</sup>Athu amohi oMasedoniya edha ni miyo yuufwanyani mwihisasanyedhe, hiyo dinaakalena manyazo mwaha wowi nahikalana ororomela wujinji wa nyo. Nyo teto muneere okalana manyazo. <sup>5</sup>Gihoona wi yaali yoofuneya waaloba mwa ntidi addibila esogole wi yasanyedhe mvahi muroromelihiinyu. Vano ndo, mvahi oyo onaakale mvahi ovahiliinyu mwa ofuna weenyu, ohuli moowaddihedhiwa.

### Ovaha moohagalala

<sup>6</sup>Muubuwelele nda: Onadhala vang'ono, onahadda vang'ono; onadhala vajinji, onohadda dhijinji. <sup>7</sup>Kadda muthu avahege wona munafunela murima waaye, ehili mookubanya naari owaddihedhiwa, wovi Mulugu onowaadhivela ale enavaha ni ohagalala. <sup>8</sup>Mulugu onowaanda wuuvahani mookwaranyiha munafuneliinyu wi mwa dhego dhaatedhene teto mwa mudhidhi dhaatedhene mukalegenaave dhaatedhene dhinarabuleliinyu mookwaranya wi mwiiregena musawo waatene wa mabasa apama. <sup>9</sup>Wona mulebeliwiwa mMalebani Ootaleleya, yiira:

*“Oliye ahipeleka mootapuwa,  
waavaha oohaleeliwa;  
wogoowa waaye fwa okala ni okala”.<sup>m</sup>*

<sup>10</sup>Vano Mulugu onavaha bewu wa ole onadhala ni onavaha mukaathe wi ekale yooja yaaye, oneere wuuvahani ni weenjehedha bewu yeenyu. Oliyeene oneere wenjedhedha dhoovaha dha wogoowa weenyu. <sup>11</sup>Nyo muneere okalana dhijinji mwa dhaatedhene wi mwa dhaatedhene mveleelege moowoma murima. Mvahi mulubale weenyu, oveleeliwe odheela wa hiyo, oneere ovaha omutthettheela Mulugu.

<sup>12</sup>Dhili ayi: Mabasa ala oweela enawiriinyuna kinaakwaneliha dhoorabulelave dha nlogo na Mulugu, mbwenye teto enotatamula vajinji

<sup>m</sup> 9.9 Masaalimu 112.9

omutthetheela Mulugu. <sup>13</sup>Aliwa eneerege omuthithimiha Mulugu, vowi mabasa ale enaahiddiinyu enowawooniha wi munorumeedha Muselu Wapama wa Kirixtu. Vano teto aliwa eneerege omutthetheela Mulugu mwaha wa mvahi dhinaavahiinyu mootapuwa wa aliwa ni amohi. <sup>14</sup>Eneerege wuulobeelani ni odhivela wujinji mwaha wa mahala enatekuma, ayene Mulugu enoovahiinyi.

<sup>15</sup>Nnomutthetheela Mulugu mwaha wa mvahi woohuwogeya onani-vahiye.

### Wiyaakihedha wa Pawulo ni okoneya wa arumiwi ooratha

**10** <sup>1</sup>Miyo Pawulo, mwa opwaasa ni owoma murima wa Kirixtu, ginoloba wa nyo. Onawoga di miyo, ole onamwiiriinyu oopwaasa akala vameentoni va nyo, oowali akala woolapelana ni nyo! <sup>2</sup>Ginowuulobani wi gadha wewo muhugiwaddihedhe okala oowali, owali ginniimina mwa ebaribari onafuniimi wooniha wa ale enawoga wi nneedda ni mukalelo wa omuthu. <sup>3</sup>Naari nikalagave mwa omuthu, kannawana mwa omuthu. <sup>4</sup>Vowi yeela dhinalabiihuna mukoddoni mweehu kahuwo dha omuthu. Moohiyaniha, yeela ndo dhihakalana owodha wa Mulugu woobwanyulana kaambura dhoolibihwa ni moobuwelo eebeweene. <sup>5</sup>Nihibwanyula wiithukulela waatewene wa omuthu, wewo onaahiiha athu wi emunone Mulugu. Nimage moobuwelo maatene a omuthu, niirihaga wi ekale omwiiwelela Kirixtu. <sup>6</sup>Nyo mwakala owiiwelela mowaakwana, hiyo nili owiisasanyedheene wi noonihe goyi ohiiwelela waatewene.

<sup>7</sup>Munoona mooneyelo a dhego baahi. Akala muthu ohukanna ebaribari wi da Kirixtu, oobuwele wi wona oliye oli a Kirixtu, hiyo teto nili a Kirixtu. <sup>8</sup>Miyo kagidha gikalana manyazo, naari giithukulelaga mookwaranya mwa owodha givahiwiimi ni Nabwiya, vowi owodha wula givahiwe wi guwunnuwiheni mMunebani, ohuli wowuubwanyulani. <sup>9</sup>Kaginafuna wi gikalegehi ginafuna wuwoopopihani ni makaarata aaga. <sup>10</sup>Dhinowogiwa wi: “Makaarata a Pawulo ba owali teto ba kopolo mbwenye oliye akala ni hiyo onakala ookurumuwa, dhoowoga dhaaye soddiddilela”. <sup>11</sup>Muthu oyo anone wi kavili ohiyana ni nde dhilebiliihu mmakaaratani viliihu woolapela ni nyo ni nde dhineeriihuna nakala ni nyo.

<sup>12</sup>Ebaribari, hiyo kannasayela wiiliganiha naari wi nikale wona ale eneethetheela weekiwa. Aliwa yeepima, yeeliganiha mmohi ni mukwaaye, enowiyooneyiha wi kinna ononelamo. <sup>13</sup>Hiyo kanneethukulele okwaranyiha munddile. Niithukulele mminddileni mwa ddima dheehu dha mabasa Mulugu enivahiliye, baahi. Oliye dinihiyile ofiya wa nyo oKorintu wo. <sup>14</sup>Kanilupile minddile vawogiliihu ni nyo, vowi nihilaleya wewo. Naali owambeela odhana Muselu Wapama wa Kirixtu woolapawo

oli nyo. <sup>15</sup>Kanilupile minddile niithukulelaga mwa mabasa a athu amohi. Nnojejiha wi nrromelo neenyu nunnuwege, ndo mabasa eehu eneere wunuwa vaari veenyu. <sup>16</sup>Ndo nneerege olaleya Muselu Wapama mirudda dhimohidhiwa okwaranya mule munakaliinyu, nihivolowelaga mudda dha athu amohi wi nihiithukulele ni mabasa yaahiddiliwa. <sup>17</sup>Wona munawogela Maleba Ootaleleya wi: “*Ole onafuna wiithukulela, eethukulele mwa Nabwiya*”.<sup>n</sup> <sup>18</sup>Kahuwo ole oneyiira yeeka wi dapama oli apama, mbwenye ole Nabwiya onamwiiriyi apama.

### Pawulo ni arumiwi ooratha

**11** <sup>1</sup>Ginafuna wi mvilele ni miyo, vovi ginawoga otaduwa vang'ono. Ebaribareene mukalena ovilela! <sup>2</sup>Vovi aje yinniimina ni nyo enadha wa Mulugu. Vovi guhuuroromelihani oteliwa ni mulobwana mmohi baahi, oli Kirixtu wona namwali ooromeleya ohumunonile mulobwana. <sup>3</sup>Vano wona Eva anyengethiwe ni dhooratha dha nyowa, ginowoova wi moobuwelelo eenyu enaadhe ehulosiwe, wi nyo mwihye omweebedha Kirixtu ni murima mmohive, woweela.<sup>o</sup> <sup>4</sup>Vovi nyo munovilela pama ni muthu onafiya oolaleyelani Yesu oohiyana ni onamulaleyiihu. Munorumeedha pama muneba woohiyana ni Muneba wa Mulugu. Teto munowaakela pama muselu woohiyana ni Muselu Wapama munaakaliinyu wa hiyo. <sup>5</sup>Miyo ginoona wi kagili mung'onong'ono mwa arumiwi ayo oovuwesesa. <sup>6</sup>Naari gihiwogagave pama, mwa ononelamo kagili oohaleela. Mwa dhego dhaatedhene, mwa mukalelo waatene nnwoonihani ononelamo weehu.

<sup>7</sup>Gihithega guulaleyeliimini Muselu Wapama wa Mulugu mwa mahala? Gahiiveviha wi nyo muthukuwe. Sowi gahiirihya yootakala? <sup>8</sup>Gajela gerezha dhimohidhene wi giimelele vaari veenyu. <sup>9</sup>Gaaliimi ni nyo gahaleeliwa yego si yego kagamukathamiha muthu. Addibila yadhiile oMasedoniya yahigidheelana dhaatedhene dharabuleliimi. Giiriliimina mundduli, gineeriimi giiregena osogolo si ela: Miyo kagidha guuwaddihedhani wi mugikamihedhe. <sup>10</sup>Ebaribari ya Kirixtu eli mwa miyo, mowindo ginowaaddelani: Kalivo muthu mmuruddani mwa Akaya onamaalihe wiithukulela waaga wula. <sup>11</sup>Ginawogela ndala mwaha wa ddi? Sowi kaginoodhivelani? Mulugu ohunona wi ginowuudhivelani.

<sup>12</sup>Dhineeriimina, gineerege wiiranaave. Vovi kaginafuna ovaha mpaatha woviithukulela wa ale wi etthettheege mabasa eewa yiiraga wi eneedda mwa mukalelo mmohive nneeddiihu. <sup>13</sup>Alobwana ayo arumiwi ooratha, amalaba oonyengetha, yiilogohaga wi arumiwi a Kirixtu. <sup>14</sup>Eyo kahuwo yootikina, vovi Sathana teto onowiilogoha wiyooneyihaga wona mungero oowaara. <sup>15</sup>Mowindo kahuwo yego yootikina akala teto

<sup>n</sup> 10.17 Zheremiya 9.24    <sup>o</sup> 11.3 Moone Wambeela 3.1-5.13

amwiimeleli aaye enowiilogoha yiiraga wi amwiimeleli a dhowogoowa. Omagomelo weewa onaakale wooligana ni dhowiira dheewa.

### Orabula wa Pawulo mwaha wa orumiwi waaye

<sup>16</sup> Ginowoga dila biili: Ahikalevo muthu owuubuwelela wi gili taduwa. Mbwenye akala munowuubuwelela dhedho, mugaakele wona taduwa wi teto gikalena mpatha wowiithukulela vang'ono. <sup>17</sup> Ginawoga ni wiithukulela wona taduwa, kaginawoga mwa epaddi ya Nabwiya. <sup>18</sup> Athu ajinji enowiithukulela mwa weekiwa. Vano teto gineere giithukulele. <sup>19</sup> Muli oononelamo vajiinji, mwaha wa eyo munovilela pama moohagalala ni ataduwa. <sup>20</sup> Munovilelana ale enoolamulani wona adhaari, naari enoojelani, enoonyengethani, munovilelana ale eneethukulela ni ale enooddwadhani mbarutuni. <sup>21</sup> Miyo kaguwiireleni mukalelo oyene. Soofuneya nkalegena manyazo mwaha wookala oolodhowa vajiinji vowuwiirelani obure? Naari!

Akala amohi enoxixa wiithukulela mwaha wa yego emohiwa, miyo teto gineere oxixa wiithukulela mwa eyene (ginawoga wona taduwa). <sup>22</sup> Akala aliwa aHeberi woobaliwana? Miyo teto gili! Akala aliwa aEzarayeli? Miyo teto gili! Akala aliwa ba nlogo na Abarahamu? Miyo teto gili! <sup>23</sup> Akala aliwa amwiimeleli a Kirixtu? Miyo teto gili ootthabwa waakwaranya aliwa! Ginawoga wona taduwa. Vowi miyo gihilaba vajiinji waakwaranya aliwa, goofugeliwa mukaambura dila dhijinji waakwaranya aliwa, ghirabula ni makofi ooheelengeya, vakukuuve ni opiwa dila dhijinjidhene. <sup>24</sup> Dila tanu aZhudewu egiwaxulaga ni miwaxuwaxu makumi mannayi ovenyihavo mmohi.<sup>p</sup> <sup>25</sup> Dila thaaru giddwadhiwaga ni golomondo. Dila emohi gahivonyiwaga ni mabwe. Dila thaaru gibwina naga ni mwanddeya, gahivireliwa mahiyu ni nlabo nimohi gimbeluwaga munyaza. <sup>26</sup> Moolendo majinji gawiiriliimi gowoopopihiwa ni odhaala wa mahinje, gowoopopihiwa ni ambava, wiinyuweliwa ni athu a nlogo naaga ni ale yahaali aZhudewu, dhowoopiha mmaluwani ni mukokolani, dhowoopiha munyaza, dhowoopiha dha addibila ooratha. <sup>27</sup> Goolaba mabasa oovaadda ofiyedha ogoma, dila dhijinji kagagona, goovoliwa dala ni nthona, goohaleeliwa nyuba, yooja ni yoowara. <sup>28</sup> Ohiya dhedhi, malabo maatene goonyemeliwa ni okathamiheyela gerezha dhaatedhene. <sup>29</sup> Mmohi akala oolodhowa, miyo teto ginakala oolodhowa. Ddibila athegihiwa, miyo ginakala owukuuwa.

<sup>30</sup> Akala vihikala mwaha wi giithukulele, gineere giithukulele ni dhego dhinooneyiha olodhowa waaga. <sup>31</sup> Mulugu, Babe a Nabwiya eehu Yesu, Babe oyene onathithimihiwa okala ni okala ohunona wi kaginooratha. <sup>32</sup> Ngali nluwa na oDamasiku, kuminadori a wewule athomiwe ni mwene

---

<sup>p</sup> 11.24 Nlamulo nnowoga wi muthu athega kaddwadhiwege okwaranya miwaxaxu maku mi mannayi. Moore Deteronomiyo 25.3.

Areta ahaahela anamaang'anela mmavolowelo mwa nluwa wi egihidde. <sup>33</sup>Mbwenye gahiheliwa mmuddangani, ogikitihedha vazhaneelani na cinga na nluwa. Mowindo gahivulumuwa mmadani mwa kuminadori ole.<sup>9</sup>

### Dhwoonihiwa ni dhoovuhuleliwa dha Pawulo

**12** <sup>1</sup>Soofwanelela wi giwelele wiithukulela, naari dhihipureleyaga yego. Dhiinova gineere giwoge Nabwiya dhigoonihiliye, dhigivuhuleliye. <sup>2</sup>Gihimunona mulobwana mmohi mwa Kirixtu, vihivira yaaka kumi ni yaaka nnayi, vithukuleliwiye odhulu wa neethaaru. Akala othukuliwe agali mmwiilini naari othukuliwe agali ode wa mwiili, kaginionile, Mulugu dinonile.<sup>r</sup> <sup>3</sup>Vano ginonile wi mulobwana oyo othukuleliwe omburoni wooriya wa Mulugu odhulu; akala othukuliwe agali mmwiilini naari agali ode wa mwiili, kaginionile, Mulugu dinonile. <sup>4</sup>Vano ahiwa dhego dhihinaaddeliwa muthu, dhego dhihinarmedhihiwa owogiwa. <sup>5</sup>Gineethukulele mwa mulobwana wona oyene, mbwenye mwa miyo meenka kagineethukulele, waahikala mwa olo-dhowa waaga. <sup>6</sup>Naari gahaafunege wiithukulela kagakala taduwa, vovi gawogege ebaribari. Ginathawa wiirana dhedho wi ahikalevo oogunnu-wiha ohiya dhinooniye mwa miyo naari dhinewiye mwa miyo.

<sup>7</sup>Vano wi agifugele gihiithukulelege vajinji mwaha wa dhoovuhulela nda dhili dhookwaranya, ohugivaha mwiinga mmwiilini mwaaga, waali wona muliba mutheenga a Sathana wi agoonihe goyi, gihiithukulelege vajinji. <sup>8</sup>Gahimuloba Nabwiya dila thaaru wi avenyihemo goyi ela mwa miyo. <sup>9</sup>Mbwenye oliye ahigaakula, wiira: “Mahala aaga ehaakwana wa we, vovi owodha waaga onooneya mowaakwana mwa olodhowa”. Mowindo, miyo Pawulo gineerege wiithukulelave vajinji ni ohagalala mwa dhoolodhowa dhaaga wi owodha wa Kirixtu okale mwa miyo. <sup>10</sup>Vano ginohagalala mwa dhoolodhowa, mwa dha oruwaniwa, mwa dhoorabula, mwa dhooharahariwa ni mwa dhookubanya, mwaha wa owodha wa Kirixtu. Vovi gakala oolodhowa finakaliimi a kopolo.

### Okathamiheya wa Pawulo mwaha wa gerezha ya oKorintu

<sup>11</sup>Gaali taduwa, mbwenye nyo dagiwaddihedhe dhedho. Mweerege ogiirela onamoona, vovi kagili mung'onong'ono mwa arumiwi ayene enawiiriinyu ookwaranya, naari gihilive yego. <sup>12</sup>Gihooniha orumiwi wa ebaribari vaari veenyu, vovi giheedda ni ovilela waatewene, guuvahagani dhootikiniha, dhitoonyihedho ni mabasa a kopolo a Mulugu. <sup>13</sup>Nyo mwihyanihiwe addi ni gerezha dhimohi, ehili ohiyana

<sup>9</sup> 11.33 Moone Meerelo a Arumiwi 9.25 <sup>r</sup> 12.2 Madhu ala okuma va verisikulu 2 odhowa verisikulu 4 Pawulo oneyaagana oliyeene.



wowi kagaali yoonemela wa nyo? Kamwiirena, mugilevelele opudha waaga!<sup>s</sup>

<sup>14</sup>Dhiinova gihiisasanyedha wi gidhe guwooneni dila ya neethaaruu. Kaginaakale yoonemela wa nyo, vovi kaginafuna dhookalana dheenyuu mbwenye ginooofunani nyooya. Vovi ahima kinaatugumanyela dhoo-reela abaabi eewa mbwenye abaabi binaatugumanyela dhoo-reela aniiwa. <sup>15</sup>Miyo gineerege onoongave dhaatedhene dhinniimina teto gineerege winoongave ni miyeene mwaha wa opama wa dhigumi dheenyuu. Akala ginowuwoonihani odhivela vajinji, nyo mugidhivelege vang'ono? <sup>16</sup>Naari ebaribareene gihinakalegeve yoonemela wa nyo, munoobuwelela wi gahuunyengethani ni oratha waaga wi guumageni. <sup>17</sup>Miyo guhuujelani odheela mwa muthu bure goorumihedhiimini? <sup>18</sup>Gahimukokomeza Titu odha wuwoonani, gahimuruma ddibila mmohi ni oliye. Sowi Titu ohuujelani yego? Titu ni miyo kanneedda mmunebani mmohive? Kanneedda dila emohive?

<sup>19</sup>Munoobuwelela wi mudhidhi waatene nnowiyaakihedha vameentoni veenyuu? Eehi, addibila oodhivela, nnawoga vameentoni va Mulugu wona muthu oli mwa Kirixtu, dhaatedhene dhineerihuna nneerana wi nuulibiheni. <sup>20</sup>Ginowoova wi gafiya owaninyuwo guufwanyeni mugali oohiyana ni mukalelo oyene wafuniimi. Ginowoova teto ogifwanyana mukalelo woohiyana ni oyene wafuniinyu. Ginowoova ofwanya vaari veenyuu okangana, nrima, owali, ogawanyeya, owana-wana, oganana, wiithukulela ni mpovoso. <sup>21</sup>Ginowoova wi gaadhaaga wuwoonani dila emohi, Mulugu aaga agikalihena manyazo vameentoni veenyuu, gidhe giindde mwaha wa ajinji mwa nyo ethegile wale ehitaruwile mwa dhootakala, oraruwa ni ojeberuwe weeriisuna.

### Wiyaakihedha wa Pawulo

**13** <sup>1</sup>Wula onakala wuweeddelani waaga wa neethaaruu. “*Soofuneya muladdu waatene okaraateliwege ni anamoona abiili naari araaruu ohunawogiwe*”.<sup>t</sup> <sup>2</sup>Gaaliimi ni nyo dila ya nabiili, gahaawaraaliha ale yathegile. Dhiinova viliimi woolapela, ginaalebela ale yathegile wale ni amohiwa wi: Gadha giwelaga kaginaabebeedhela, <sup>3</sup>vovi nyo muno-loba etoonyihedho akala Kirixtu onowoga odheela wa miyo. Oliye okala waaye ni nyo kahuwo oolodhowa, mbwenye oowodha vaari veenyuu. <sup>4</sup>Mwa ebaribari, ahikomeliwa mwa olodhowa, mbwenye ohukalawo mwa oowodha wa Mulugu. Mwa mukalelo mmohive nili oolodhowa mwa Kirixtu, mbwenye mwa mukalelo waaga ni nyo nnaakalege muumohi-ni ni Kirixtu mwa oowodha wa Mulugu. <sup>5</sup>Mwiipime weekiinyu, moone

<sup>s</sup> 12.13 *Mugilevelele opudha waaga* Pawulo ahinona wi kanna muladdu, afuna aakalihena manyazo aKorinto yaakelile kaarata ela. <sup>t</sup> 13.1 Deteronomiyo 19.15

akala munoweeda munroromeloni, mwiyehe weekiinyu. Kamunonile wi Yesu Kirixtu oli mwa nyo? Dhaahikala ndo muhulepela. <sup>6</sup>Ginojejiha wi munone hiyo kanili oolepela. <sup>7</sup>Nnolobela wa Mulugu wi mwihiregena yootakala eli yaatene. Kahuwo wi amohi enoonege wi hiyo nili oononesesa, mbwenye wi nyo mwiiregena eli yapama, naari dhooneyaga wi nili oolepela. <sup>8</sup>Hiyo kannanda wiirana yego yovaanyihana ni ebaribari, mbwenye nneerana dhego dhapama wa ebaribari, baahi. <sup>9</sup>Nnohagalalave vinakaliihu oolodhowa, nyo mugali akopolo. Mmalobeloni mweehu nnaloba wi mukale oolemelela. <sup>10</sup>Mwahaya buuyene ginalebeliimi dhego dhedhi ngali woolapelawene wi gadha wuwoonani vihikale yoofuneya wi guulamuleni mwa kopolo, voolabiha owodha ogivahile Nabwiya wi guulibiheni, ehili wuubwanyulani.

### **Malojelo oogomihedha**

<sup>11</sup>Addibilaga, arogoraga, voomariha: Muhagalale. Musayelege olemelela, muwaraalihanene mwa oddibila, mukalena mirima dhimohive, mukalege mmurenddeleni. Vano Mulugu oodhivela a murenddele onaakalege ni nyo.

<sup>12</sup>Mulojelane mmohi ni mukwaaye ni bezhu ya odhivelana wa eKirixtu. Oweela mirima aatene enowuulojelani.

<sup>13</sup>Mahala a Nabwiya Yesu Kirixtu, odhivela wa Mulugu, omohi wa Muneba Woweela okalege ni nyo mwaatene.